

ABV ta kere den Dialogo Social, pero

Reunion riba hisamento di tarifa di coriente ABV no ta haya como Dialogo Social



ORANJESTAD – Aunke diahuebs ultimo sindicato di trahadonan di hospital ABV a lanta for di e reunion di Dialogo Social, nan ta kere ainda riba e instrumento aki.

Presidente di ABV, sra. Gina Maduro como sindicalista a keda masha desapunta riba e dinamica cu a tuma lug diahuebs ultimo den seno di Dialogo Social, unda a wordo trata e topico riba hisamento

di e prijs di coriente.

“Esey no ta Dialogo Social. E compania ta para duna presentacion y ta bin muestra pa kico nan tin cu hisa tarifa”, el a declara na Bon Dia Aruba ayera.

E ta considera cu loke a tuma lug e delaster sesion di Dialogo Social tabata gewoon un presentacion. Pesey sra. Maduro ta considera cu na lug cu nan a reuni pa de-

libera como partner riba e topico aki, tabata miho pa nan pone den corant y informa cu entrante luna di october tarifa di coriente lo wordo hisa y organisa un conferencia di prensa pa bisa pakico a wordo subi.

Mirando e forma cu esaki a tuma lug e sindicalista no ta haya e motibo pa kico nan ta bay sinta den Dialogo Social, ya cu practicamente nan no tin nada di bisa, pues e no ta considera cu esaki ta un Dialogo Social.

Dialogo Social

Presidente di ABV sra. Gina Maduro a declara cu berdaderamente nan ta kere den Dialogo Social. Pues e decision di diahuebs ultimo di retira for di Dialogo Social no ta definitivo.

“Noooo, a nos ta kere den Dialogo Social, no ta cu nos a

sali y no bin nunca mas”, sra. Maduro a declara na Bon Dia Aruba.

El a bisa su confiansa riba Dialogo Social ya cu e ta kere cu via dialogo y sinta na mesa por wordo resolvi cualquier situacion. Pero pa loke a tuma lug riba hisamento di tarifa di coriente ABV no ta haya cu e tabata un Dialogo Social.

“No tabatin Dialogo Social. Dialogo Social ta uno unda cada participante, doño di trabou y sindicato ta trece su puntonan dilanti y ta wordo firma y presenta na Parlamento”, el a bisa E ta considera cu lamentablemente esaki no a sosode diahuebs ultimo, ya cu sin mas el a bira informacion so.

Reunion di Sivis

Recientemente ABV a bay atende un congreso organisa pa ILO y Stichting Scholings Instituut voor de Vakbeweging in Suriname (Sivis) na

Surinam, unda un punto cu a wordo trata tabatin di haber cu importancia di Dialogo Social.

Como delegacion ABV a bin cu basta informacion riba importancia y funcionamiento di Dialogo Social como vehiculo pa trece informacion ora cu decision grandi ta bay cay cu no ta gobierno di Aruba so ta dicidi.

Sino cu tin partnernan social cu nan opinion ta conta, y nan como sindicato ta representa gran parti di e clase trahado, sindicalista Maduro a bisa. Tambe tin e parti di e doñonan di trabou y pesey e Dialogo Social ta tripartiet: Doño di trabou, sindicato y gobierno.

“Di e forma aki nos por yega na un miho decision pa nos pais”, el a afirma. Sindicalista Maduro ta considera cu tin agenda ta wordo impone; mientras cu e partner tambe mester dicidi riba kico ta e puntonan cu mester wordo trata. □